

Festival di Dande ta bira un combinacion di un grabacion y un presentacion en vivo

ORANJESTAD (AAN): E aña aki Dande ta bay wordo celebra na un manera virtual y durante un conferencia di prensa di minister di Cultura Xiomara Maduro, Ray-Anne Hernandez di Fundacion Promove Cultura cu ta encarga

cu e festival infantil y hubenil di Dande, a duna un splicacion di locual ta bay sosode.

“Despues di varios siman di deliberacion cu representantenan di Departamento di Cultura, Comision Celebracion Dianan

Nacional y ministerio di Cultura, nos a bin na e decision cu ambos fundacion lo cera cabez cu e organizacionnan menciona, pa yega na un acuerdo riba con ta organiza e festival di Dande e aña aki, segun Hernandez.

El a sigui bisa cu di tur e ideanan cu a bin dilanti, a scoge pa haci e festival un combinacion di un grabacion y un presentacion en vivo. Locual ta bay pasa ta cu cada agrupacion lo haya un invitacion pa nan bin cu nan participantenan



na un studio.

Eynan cada un di e participantenan di ambos festival lo wordo graba, despues di cual riba 27 y 28 di December ta bay tin e parti live di presentacion.

“E cantante y bandanan lo no tey live, pero si ta bay tin un grupo chikito di hurado y un MC pa haci e presentacion live di participantenan”, segun Hernandez.

El a sigui bisa cu e festival di infantil y hubenil ta bay wordo parti den categorianan di 4-6 aña, 7-9 aña, 10-12 aña y 13-17 aña.

E cancionnan mester ta di 4 pa 4 minuut y mey, pero mucha chikito por canta 2 pa 2 minuut y mey.

“Tabata tin comunicacion tambe cu Crisis Team y DVG y a yega na un palabracion cu e bandanan mester participa cu no mas cu 12 integrante riba escenario na e studio di grabacion”.

E cantante (mucha of hubenil) mag di tin solamente 1 persona hunto cune.

Mirando cu ta un grabacion, den e parti infantil y hubenil e presidente di hurado lo ta presente na e grabacion y e por duna un chens na un participante cu quizas a comete un fout den su presentacion, segun Hernandez.